



Inatsisartut suleriaasianni § 37 naapertorlugu matumuuna Naalakkersuisunut imaattunik apeqquteqaatinik saqqummiussivunga:

**Naalakkersuisunut apeqqutit:**

- 1. Kalaallit Nunaanni teriannissat eqqissisimatitaanerit pillugu Namminersornerullutik Oqartussat nalunaarutaat nr. 20 ulloq 17. maj 1989-imeersumi, § 2. Teriannissat piffissami 15. maj - 15. september eqqissisimatitaanerisa sivikillineqarsinnaanerit imaluunniit inunnu uumasunnullu allanut ajoqutaasinnaanerit tunngavigalugu piffissami aaliangersimasumi eqqissisimatitaajunnaarallarnissaat Naalakkersuisunik qanoq isumaqarfigineqarneris apeqqutingaara?**
- 2. Timmissat illersorneqarnerit piniagaanerallu pillugit Namminersornerullutik Oqartussat nalunaarutaat nr. 8, 2. marts 2009-meersumi allaqqavoq tulukku (Corvus corax) 1. september – 28/29. februar ilanngullugu piniarneqarsinnaasoq. Taamatuttaaq naajaannaq (Larus glaucoides) 1. september - 30. april piniarneqarsinnaalluni. Timmissat pineqartut piffissami sivilisunerusumik piniarneqarsinnaanerit imaluunniit inunnu allanullu akornutaalersimanerit pillugu piffissami aaliangersimasumi eqqissisimatitaajunnaarallarsinnaanerit Naalakkersuisunit qanoq isumaqarfigineqarneris paaserusuppara?**
- 3. Ilanngullugu paaserusuppara qulaani pineqartut annertuumik ajoqutaasut piffinni assigiinngitsuni malunnarsisimappata taava piffissamik aalajangersimasumik sivilisussusilimmik eqqissisimatitsinerup atorunnarallarnissaanut Naalakkersuisut kommunit suleqatigalugit qulaani apeqqutit pineqartut pillugit qanoq iliuuseqarsinnaanersut?**

(Inatsisartunut ilaasortaq, Anthon Frederiksen, Partii Naleraq)

## **Tunngavilersuut:**

Naluneqanngilaq teriannissat, tulukkat naajallu qangaanerusumut naleqqiullugu piniagaasarnerat annikillerujussuarnikuusoq.

Taamaammallu uumasut timmissallu pineqartut inoqarfinni ilaatigut annertuumik akornutaalersimasut aamma nalunngilarput. Ilami allaat peqqissutsimut akornusiisinnaallutillu inunnik uumasuutinillu allanik ulorianartorsiortitsisinnaapput, pingaartumik teriannissat perlerortarnerat eqqarsaatigalugu.

Tassami aamma nunatta kujataani savaateqarfinni tusarsaajualerpoq, teriannissat perlerortut uumasuutinut allannut saassussisartut.

Aamma naluneqanngilaq, qeqertat ilaanni, soorlu imeqqaalaqarfinni teriannissat assorujussuaq akornutaalersimasut.

Taamaammat teriannissat akornutaalersimanerat akiorneqassappat, imal. Piffissami alinjangersimasumik sivissuasilimmik aasami eqqissisimatitaasarunnaarallarnissaat avaqqukkuminaatsoq takuneqarsinnaavoq.

Pingaartumillu naajat eqqarsaatigalugit timmissat allat manniliortarfiini, manninnik timmissallu allat piaraannik ilanngarterilluartartut ilisimaneqarpoq. Tassani immikkut eqqaasariaqarpoq "Kitsissunnguit" eqqissisimatitaanissaat pillugu Namminersornerullutik Oqartussat nalunaarutaat nr. 11, 17. april 2008-meersoq tunngavigalugu qeqertat inatsisitigoortumik eqqissisimatinneqalerput.

Aamma ilisimaneqarpoq, pingaartumik naajat tulukkallu eqqaaveqarfinni illullu naliginnaasumik eqqaaviini serlersaarisartut.

Taamaammat naajat tulukkallu inoqarfinni, timmissallu manniliortarfiini akornutaalersimanerat akiorneqassappat, taakku ukiuni tallimani quliniluunniit aasami eqqissisimatinneqartarnerat atorunnaarsinneqarallartariaqarnera avaqqukkuminaappoq.

Kissaatigaara apeqqutikka ullut qulit qaangiutsinnagit akineqarnissaat.